



Broj: 05/1-50-13-312-3-4/14
Sarajevo, 23.04.2014.godine

IZVJEŠTAJ

o radu Nezavisnog odbora Parlamentarne skupštine Bosne i Hercegovine kao nezavisnog tijela policijske strukture Bosne i Hercegovine za 2013. godinu

april 2014. godine

SADRŽAJ:

POGLAVLJE I. UVODNE NAPOMENE	3
POGLAVLJE II. NADLEŽNOSTI NEZAVISNOG ODBORA	3
POGLAVLJE III. IZVRŠAVANJE ZADATAKA IZ NADLEŽNOSTI NEZAVISNOG ODBORA.....	4
Odjeljak A. Realizacija zadataka kroz održavanje redovnih sjednica Nezavisnog odbora	4
POGLAVLJE IV. SARADNJA S MEĐUNARODNIM ORGANIZACIJAMA I OSIGURANJE JAVNOSTI RADA.....	6
POGLAVLJE V. ADMINISTRATIVNO-TEHNIČKA PODRŠKA RADU.....	6
POGLAVLJE VI. PREPORUKE I ZAKLJUČCI.....	6

Na osnovu člana 7. stav (1) tačka e) Zakona o nezavisnim i nadzornim tijelima policijske strukture Bosne i Hercegovine i člana 9. tačka e) Poslovnika o radu Nezavisnog odbora kao nezavisnog tijela policijske strukture Bosne i Hercegovine, Nezavisni odbor je na 31. sjednici, održanoj 11. 2. 2013., usvojio i Parlamentarnoj skupštini Bosne i Hercegovine podnosi sljedeći

I Z V J E Š T A J

o radu Nezavisnog odbora Parlamentarne skupštine Bosne i Hercegovine kao nezavisnog tijela policijske strukture Bosne i Hercegovine za 2012. godinu

POGLAVLJE I. UVODNE NAPOMENE

Nezavisni odbor osnovan je Zakonom o nezavisnim i nadzornim tijelima policijske strukture Bosne i Hercegovine ("Službeni glasnik BiH", broj 36/08), kao nezavisno tijelo Parlamentarne skupštine BiH.

Nezavisni odbor ima devet članova koji su imenovani na mandat od četiri godine odlukom Parlamentarne skupštine BiH ("Službeni glasnik BiH", broj 59/09).

POGLAVLJE II. NADLEŽNOSTI NEZAVISNOG ODBORA

Nezavisni odbor je, u skladu sa Zakonom o nezavisnim i nadzornim tijelima policijske strukture BiH i Poslovníkom o radu Nezavisnog odbora, nadležan za provođenje procesa odabira kandidata i predlaganje smjenjivanja policijskih rukovodilaca i zamjenika rukovodilaca policijskih tijela BiH; objavljivanje javnih konkursa i razmatranje prijave kandidata, vršenje odabira i dostavljanje ministru sigurnosti BiH imena najviše pet kandidata za rukovodioce i imena najviše pet kandidata za zamjenike rukovodilaca policijskih tijela BiH, predlaganje smjenjivanja rukovodilaca i zamjenika rukovodilaca policijskih tijela BiH, ako su počinili krivično djelo, osim za krivična djela iz oblasti sigurnosti saobraćaja, ili ako počine tešku povredu službene dužnosti, kao i u slučaju ako utvrdi da ne postižu odgovarajuće rezultate, razmatranje pritužbi na rad rukovodilaca i zamjenika rukovodilaca policijskih tijela BiH i obavještanje o tome ministra sigurnosti BiH i Vijeća ministara BiH, iniciranje pokretanja disciplinskog postupka protiv rukovodilaca i zamjenika rukovodilaca policijskih tijela BiH, obradu podataka i vođenje evidencije u skladu sa zakonom i drugim propisima i ostale poslove propisane zakonom, Poslovníkom o radu i drugim propisima.

POGLAVLJE III. IZVRŠENJE ZADATAKA IZ NADLEŽNOSTI NEZAVISNOG ODBORA

Osnovna nadležnost Nezavisnog odbora je provođenje procesa odabira kandidata za rukovodioce i zamjenike rukovodilaca policijskih tijela BiH, te s tim u vezi objavljivanje javnih konkursa i razmatranje prijave kandidata, vršenje odabira i dostavljanje ministru sigurnosti BiH imena najviše pet kandidata za rukovodioce i imena najviše pet kandidata za zamjenike rukovodilaca policijskih tijela BiH.

U vezi s navedenim, Nezavisni odbor u 2013. godini pokrenuo proceduru u vezi sa izborom rukovodilaca i zamjenika rukovodilaca policijskih tijela BiH.

Osim ove nadležnosti, Nezavisni odbor nadležan je i za predlaganje smjenjivanja rukovodilaca i zamjenika rukovodilaca policijskih tijela BiH, iniciranje pokretanja disciplinskih postupaka protiv rukovodilaca policijskih agencija BiH. Potrebno je naglasiti da je tokom 2013. godine nije bilo pritužbi na rad rukovodilaca i zamjenika rukovodilaca policijskih tijela BiH

Nezavisni odbor u 2013. godini nije ocijenio potrebnim inicirati pokretanje disciplinskog postupka protiv rukovodilaca i zamjenika rukovodilaca policijskih tijela BiH, a ni predložiti njihovu smjenu zbog počinjenog krivičnog djela, teške povrede službene dužnosti, nepostizanja odgovarajućih rezultata ili osnovanih žalbi građana i drugih subjekata na njihov rad.

Odjeljak A. Realizacija zadataka kroz održavanje redovnih sjednica Nezavisnog odbora

U izvještajnom periodu Nezavisni odbor redovno je održavao sjednice, na kojima je razmatrao aktuelna pitanja iz svoje nadležnosti, pri čemu izdvajamo:

Na 31. sjednici Nezavisnog odbora, održanoj 11.2.2013., razmatrani su i usvojeni Izvještaj o radu Nezavisnog odbora za 2012. godinu i Plan rada Nezavisnog odbora za 2013. godinu, koji su, u skladu sa Zakonom o nezavisnim i nadzornim tijelima policijske strukture BiH, upućeni Parlamentarnoj skupštini BiH na usvajanje. Predstavnički dom je na 44. sjednici, održanoj 14.3.2013., a Dom naroda na 28. sjednici, održanoj 16.4.2013., usvojio Izvještaj o radu Nezavisnog odbora za 2012. i Plan rada Nezavisnog odbora za 2013. godinu. Razmatrana je i informacija o problemima u radu Državne agencije za istrage i zaštitu i Granične policije BiH nakon čega je usvojen zaključak da se s navedenim problemima upozna Parlamentarna skupština BiH kako bi u saradnji s Vijećem ministara BiH i drugim nadležnim institucijama pomogla u njihovom rješavanju.

Na 32. sjednici, održanoj 24. 6. 2013., Nezavisni odbor razmatrao je informaciju o preduzetim mjerama i aktivnostima Direkcije za koordinaciju policijskih tijela BiH u vezi s održanim protestima ispred zgrada institucija BiH od 5. do 7. 6. 2013., koju je Nezavisnom odboru dostavio direktor Direkcije za koordinaciju policijskih tijela. U vezi s tim Nezavisni odbor je jednoglasno usvojio sljedeće zaključke:

1. Nezavisni odbor Parlamentarne skupštine BiH konstatira da su protesti održani od 5. do 7.6.2013. i blokada zgrada institucija BiH nanijeli veliku štetu Bosni i Hercegovini.
2. Nezavisni odbor Parlamentarne skupštine BiH konstatira da nadležne policijske agencije BiH nisu koristile iskustva iz napada na Ambasadu SAD-a.
3. Nezavisni odbor Parlamentarne skupštine BiH prihvata izvještaj Direkcije za koordinaciju policijskih tijela BiH kao objektivan, te smatra da se ne može zaključiti da je bilo značajnijih propusta u radu rukovodilaca Direkcije za koordinaciju policijskih tijela BiH.
4. Nezavisni odbor Parlamentarne skupštine BiH konstatira da se iz izvještaja Direkcije za koordinaciju policijskih tijela BiH može zaključiti da je postupanje MUP-a Kantona Sarajeva i Federalnog MUP-a bilo neadekvatno u datoj situaciji, te predlaže nadležnim nezavisnim odborima da održe hitnu sjednicu na kojoj će se izjasniti o postupanju rukovodilaca policijskih agencija iz njihove nadležnosti.
5. Nezavisni odbor Parlamentarne skupštine BiH smatra da nadležni pravosudni organi treba da izvrše analizu i procjenu postupaka nadležnih tužilaštava u vezi s predmetnim događajem.
6. Nezavisni odbor Parlamentarne skupštine BiH predlaže da Vijeće ministara BiH, na osnovu izvještaja Direkcije za koordinaciju policijskih tijela BiH i pribavljenih izvještaja mjesno nadležnih policijskih agencija, procijeni da li ima dovoljno garancija za siguran rad članova Parlamentarne skupštine BiH, Vijeća ministara BiH i zaposlenih u institucijama BiH.

Nezavisni odbor je redovno održavao komunikaciju s rukovodiocima policijskih agencija po svim bitnim pitanjima iz djelokruga njihovog rada, s posebnim naglaskom na aktivnosti koje su policijska tijela preduzimala u vezi s događanjima koja su izazivala veću medijsku pažnju.

Privremena zajednička komisija oba doma Parlamentarne skupštine BiH za provođenje procedure za imenovanje članova Nezavisnog odbora i Odbora za žalbe građana kao nezavisnih tijela policijske strukture Bosne i Hercegovine je svojom Odlukom o raspisivanju javnog konkursa za provođenje procedure odabira kandidata za imenovanje članova Nezavisnog odbora i Odbora za žalbe građana kao nezavisnih tijela policijske strukture Bosne i Hercegovine, broj:01,02-50-14-283-2,4/13, od 13.3.2013., provela konkursnu proceduru koja je okončana Odlukom Parlamentarne skupštine BiH o imenovanju članova Nezavisnog odbora kao nezavisnog tijela policijske strukture u BiH broj 01,02-34-1-110-1/14, od 12.3.2014. („Službeni glasnik BiH“, broj 20/14).

Na 33. sjednici, održanoj 27.11.2013., Nezavisni odbor pokrenuo je proceduru i jednoglasno je usvojio Odluku o raspisivanju Javnog konkursa za direktore i zamjenike direktora policijskih tijela u BiH, i to za pozicije: direktor Granične policije BiH, broj izvršilaca 1 (jedan), zamjenik direktora Granične policije BiH, broj izvršilaca 1 (jedan), zamjenik direktora Državne agencije za istrage i zaštitu, broj izvršilaca 1 (jedan), direktor Direkcije za koordinaciju policijskih tijela BiH, broj izvršilaca 1 (jedan), te zamjenik direktora Direkcije za koordinaciju policijskih tijela BiH, broj izvršilaca 2 (dva). Javni konkurs bit će objavljen u „Službenom glasniku BiH“, „Službenom glasniku Brčko Distrikta BiH“ te u tri dnevne novine: Dnevnom avazu, Dnevnom listu i Glasu Srpske.

POGLAVLJE IV. Saradnja s međunarodnim organizacijama i osiguranje javnosti rada

Rad Nezavisnog odbora pratili su i svim sjednicama prisustvovali predstavnici OHR-a. Sve sjednice Nezavisnog odbora pratili su zaposleni u Sektoru za odnose s javnošću Sekretarijata Parlamentarne skupštine BiH te predstavnici medija u BiH. Javnost se može upoznati s radom Nezavisnog odbora i kroz akte koje je ovaj odbor usvajao i kroz zapisnike, jer su objavljeni na veb-stranici Parlamentarne skupštine BiH. Na ovaj način osigurana je transparentnost rada Nezavisnog odbora.

POGLAVLJE V. Administrativno-tehnička podrška radu

Zajednička služba Sekretarijata Parlamentarne skupštine BiH je, po Zakonu o nezavisnim i nadzornim tijelima policijske strukture u BiH, zadužena da pruža svu administrativno-tehničku podršku radu Nezavisnog odbora. Kolegij Sekretarijata je, postupajući u skladu s ovom odredbom, odredio do 31. 7. 2013. Almu Salkić-Mijić, stručnu savjetnicu za zakonodavno-pravna pitanja i pravo EU u Zakonodavno-pravnom sektoru, da obavlja administrativno-tehničke i stručne poslove za potrebe Nezavisnog odbora.

Od 1.8.2013. poslove sekretara Nezavisnog odbora, u skladu s Pravilnikom o izmjenama i dopunama Pravilnika o unutrašnjoj organizaciji i sistematizaciji radnih mjesta u Sekretarijatu Parlamentarne skupštine BiH (broj: 03-02-4-172/12), preuzela je Ivana Lovrić, stručna savjetnica u Sektoru za druga parlamentarna tijela. Na ovaj način Zajednička služba Sekretarijata osigurala je uslove potrebne za rad Nezavisnog odbora angažiranjem stručnog osoblja, ali i osiguranjem materijalno-tehničkih i drugih uslova.

POGLAVLJE VI. PREPORUKE I ZAKLJUČCI

Nezavisni odbor realizirao je većinu programskih aktivnosti planiranih u 2013. godini, a u skladu sa Zakonom o nezavisnim i nadzornim tijelima policijske strukture Bosne i Hercegovine.

Nezavisni odbor predlaže Parlamentarnoj skupštini BiH da usvoji Izvještaj o radu Nezavisnog odbora kao nezavisnog tijela policijske strukture u BiH za 2013. godinu.

**PREDSJEDNIK
NEZAVISNOG ODBORA
Žiko Krunić**